

PWYLLGOR ARCHWILIO CYMUNEDAU

Cofnodion cyfarfod o'r Pwyllgor Archwilio Cymunedau a gynhaliwyd yn Ystafell Bwyllgora 1A, Neuadd y Sir, Rhuthun, Dydd Iau, 23 Ebrill 2015 am 9.30 am.

YN BRESENNOL

Y Cynghorwyr Carys Guy, Huw Hilditch-Roberts (Cadeirydd), Rhys Hughes, Win Mullen-James (Is-Gadeirydd), Bob Murray, Cefyn Williams a/ac Cheryl Williams.

Roedd yr Aelod Arweiniol, y Cynghorydd D.I. Smith, yn bresennol ar gais y Pwyllgor.

Roedd y Cynghorwyr B. Blakeley ac M.L. Holland yn bresennol fel sylwedyddion.

HEFYD YN BRESENNOL

Cyfarwyddwr Corfforaethol: Uchelgais Cymunedol ac Economaidd (RM), Pennaeth Priffyrdd a Gwasanaethau Amgylcheddol (SP), Pennaeth Busnes, Gwella a Moderneiddio (AS), Pennaeth Cynllunio a Gwarchod y Cyhoedd (GB), Rheolwr Adain: Rheoli Rhwydwaith (TT), Rheolwr Datblygu: Cynllunio a Gwarchod y Cyhoedd (PM), Cydlynnydd Archwilio (RE) a Swyddog Gweinyddol (CW).

1 YMDDIHEURIADAU

Derbyniwyd ymddiheuriadau am absenoldeb oddi wrth y Cynghorwr(wyr) Peter Arnold Evans a/ac Joe Welch.

2 DATGAN CYSYLLTIAD

Ni wnaeth Aelodau ddatgan unrhyw gysylltiad personol neu gysylltiad sy'n rhagfarn mewn unrhyw fater a nodwyd i'w ystyried yn y cyfarfod.

3 MATERION BRYN FEL Y'U CYTUNWYD GAN Y CADEIRYDD

Ni chafwyd unrhyw faterion brys a ddylid, ym marn y Cadeirydd, gael eu hystyried yn y cyfarfod yn unol ag Adran 100B(4) o'r Ddeddf Llywodraeth Leol, 1972.

4 COFNODION

Cyflwynwyd Cofnodion cyfarfod y Pwyllgor Archwilio Cymunedau a gynhaliwyd ddydd Iau, 12^{fed} Mawrth, 2015.

***PENDERFYNWYD** – derbyn a chymeradwyo'r Cofnodion fel cofnod cywir.*

5 RHESYMOLI LLWYBRAU GRAEANU RHAGOFALUS

Roedd copi o adroddiad a luniwyd ar y cyd gan Bennaeth Priffyrdd a Gwasanaethau Amgylcheddol (PPGA) a'r Rheolwr Rhwydwaith (RhRh) wedi cael ei ddsbarthu ynghyd â'r papurau ar gyfer y cyfarfod. Roedd yr adroddiad yn trafod

sut y mae Priffyrdd a Gwasanaethau Amgylcheddol yn bwriadu lleihau nifer y milltiroedd a gaiff eu graenu fel mesur rhagofalus, a gymeradwywyd fel rhan o'r broses Rhyddid a Hyblygrwydd.

Cyflwynodd Pennaeth Priffyrdd a Gwasanaethau Amgylcheddol yr adroddiad a oedd yn nodi sut yr aethpwyd ati i ddatblygu'r lleihad hwn yn nifer y milltiroedd mewn ffordd resymegol a rhesymol, a rhoddodd sicrwydd y byddai'r mesurau yn cyflenwi'r arbedion gofynnol.

Cadarnhaodd y swyddogion y byddai angen arbed cyfanswm o £250 mil yng nghyllideb cynnal Priffyrdd ar gyfer 2015/16. Roedd £60 mil posibl o'r holl arbedion wedi'u nodi drwy leihau nifer y llwybrau graeanu rhagofalus yn y Sir. Roedd y llwybrau y cyfeirir atynt yn yr adroddiad yn rhan o rwydwaith ffyrdd y Cyngor. Ni chafodd cefnffyrdd eu cynnwys gan mai Llywodraeth Cymru sydd yn gyfrifol amdanynt, gan dalu'r Cyngor i'w graeanu ar ei rhan. Pwysleisiodd mai'r cynnig oedd dileu'r llwybrau a nodwyd o'r amserlen raeanu ragofalus. Caiff y llwybrau hyn eu graeanu pan fydd eira wedi disgyn neu pan fydd rhagolygon eira.

Cadarnhaodd y Rheolwr Adain: Rheoli Rhwydwaith fod mwyafrif y llwybrau dan sylw wedi'u lleoli yng ngogledd y Sir, gan fod llwybrau amgen ar gael i ddefnyddwyr y ffyrdd. Oherwydd diffyg llwybrau amgen addas yn ne'r Sir, nid oedd mor hawdd rhoi'r broses resymoli ar waith yno.

Yn sgil newid yn y ddeddfwriaeth yn ystod y 10 mlynedd ddiwethaf, rhaid i Awdurdodau Lleol gyhoeddi ymlaen llaw bellach pa lwybrau y maent yn bwriadu eu graeanu fel mesur rhagofalus yn ystod y gaeaf dilynol, felly dyna'r rheswm dros ymgynghori ar y cynigion hyn ar yr adeg hwn.

Tynnwyd sylw hefyd at y pwyntiau a ganlyn, sydd wedi'u cynnwys yn yr adroddiad:-

- Yn ystod pob taith raeanu defnyddir 9 cerbyd i yrru cyfanswm o 850 cilometr a rhoddir halen ar 570 cilometr o'r ffyrdd.
- Roedd y newidiadau a gyflwynwyd i sicrhau'r canlyniadau gorau cyn tymor 2014/15 wedi arwain at rai cwynion gan y cyhoedd, felly byddai angen cynllunio a chydlynu'r ffordd y caiff y rhesymau dros y newidiadau eu cyfathrebu.
- Mae angen sicrhau gostyniad o tua 10% yn y llwybrau graeanu er mwyn cyrraedd lefel yr arbedion a nodwyd ar ffyrdd nad ydynt yn gefnffyrdd, yn dibynnu ar amodau'r tywydd.

Mewn ymateb i gwestiynau'r Aelodau, dywedodd y swyddogion a'r Aelod Arweiniol unwaith y byddai'r penderfyniad terfynol wedi'i wneud i dynnu'r ffyrdd a nodwyd o restrau graeanu rhagofalus y Sir, y byddent yn rhoi gwybod i'r holl awdurdodau lleol cyfagos yr oedd y Cyngor yn gweithio'n agos gyda hwy wrth raeanu ar draws ffiniau. Dyma'r drefn arferol a byddai'n llywio'r trafodaethau arferol rhwng awdurdodau ynglŷn â threfniadau graeanu trawsffiniol. Byddai'r holl arbedion mewn perthynas â'r cynnig hwn yn dod o gostau'r halen/graeau a fyddai'n cael ei arbed a chostau gweithredu'r cerbydau, ni fyddai unrhyw swyddi yn cael eu colli. Fodd bynnag, gallai gaeaf caled gael effaith andwyol ar yr arbedion arfaethedig.

O ran asesu risgiau wrth benderfynu ar y llwybrau graeanu, esboniwyd hefyd fod y swyddogion wedi ystyried y tebygolrwydd o ddamweiniau. Mewn perthynas â'r llwybrau a nodwyd ar gyfer eu tynnu o'r amserlen raeanu ragofalus, nid oedd y tebygolrwydd yn 'risg uchel', fe'i ystyriwyd yn risg 'derbyniol'. Fodd bynnag, pe bai'n dod yn amlwg fod cyfradd uchel o ddamweiniau yn digwydd byddai hyn yn cael ei adrodd i Bennaeth y Gwasanaeth a byddai'n cynnal arolwg o'r risg a'r penderfyniad ar unwaith.

Cytunodd y swyddogion y byddent yn dosbarthu'r cynigion a'r mapiau perthnasol i bob Grŵp Ardal Aelodau yn gofyn iddynt eu trafod cyn mis Gorffennaf 2015. Petai angen, byddai Swyddog Priffyrdd ar gael i ddod i gyfarfodydd y Grwpiau Ardal Aelodau i esbonio'r cynigion.

Dywedwyd wrth yr Aelodau y byddai'r adolygiad yn effeithio ar y gyrwyr yn unig. Ni fyddai unrhyw effaith anghymesur ar unrhyw grwpiau â nodweddion gwarchoddedig, a chyfeiriwyd yr Aelodau at gynnwys Atodiad 2. Roedd manylion y broses ymgynghori a fabwysiadwyd, y risgiau posibl a'r mesurau i'w lliniaru, wedi'u cynnwys yn yr adroddiad.

Ar ddiwedd y drafodaeth dilynol:-

PENDERFYNWYD – yn amodol ar yr uchod a dosbarthu'r cynigion i Grwpiau Ardal Aelodau er gwybodaeth, bod y Pwyllgor Archwilio yn cymeradwyo'r newidiadau i'r llwybrau graeanu rhagofalus.

6 RHEOLEIDDIO MEYSYDD CARAFANNAU YN WELL

Roedd adroddiad y Rheolwr Datblygu, Cynllunio a Gwarchod y Cyhoedd, a oedd yn deillio o bryderon yr Aelodau ynglŷn â'r defnydd tybiedig o feysydd carafannau gwyliau at ddefnydd preswyl a cholli incwm yn sgil hyn i'r Cyngor, wedi'i ddosbarthu ynghyd â'r papurau ar gyfer y cyfarfod.

Cyflwynodd y Rheolwr Datblygu, Cynllunio a Gwarchod y Cyhoedd yr adroddiad ac eglurodd fod cynllun peilot i asesu hyd a lled y broblem wedi amlygu cymhlethdod y gwaith a'r goblygiadau posibl o gyflwyno mesurau gorfodaeth llym, yn sydyn ar nifer o adrannau'r Cyngor ac ar unigolion a allai fod yn 'byw' ar rai meysydd. Roedd y cynllun peilot hefyd wedi amlygu bwch yn y drefn arferol o rannu gwybodaeth rhwng cangen darparu gwasanaeth y Cyngor a'i wasanaethau rheoleiddio – dros amser, gall rhannu gwybodaeth fel mater o drefn osgoi gwaethygu'r broblem a chynorthwyo i gyfrifo ffigurau poblogaeth a oedd wedi effeithio ar swm y Grant Cynnal Refeniw a ddyfarnwyd i'r Cyngor.

O ganlyniad i argymhelliad blaenorol y Pwyllgor, sef y dylai adnoddau fod ar gael i symud y prosiect ymlaen, roedd y Tîm Gweithredol Corfforaethol wedi gofyn i'r Gwasanaeth Busnes, Gwella a Moderneiddio gasglu data o holl adrannau'r Cyngor ynglŷn ag unigolion a oedd wedi nodi meysydd carafannau fel cyfeiriadau wrth wneud cais am wasanaethau neu gonsesiynau. Yn sgil y gwaith peilot cychwynnol, daeth i'r amlwg fod angen i wasanaethau rheoleiddio'r Cyngor weithio gyda

pherchnogion rhai meysydd carafannau er mwyn rhoi cymorth iddynt reoli eu safleoedd yn well a chydymffurfio â'r amodau a roddwyd arnynt.

Roedd manylion y cynnydd a wnaed er mis Rhagfyr 2014, a chanfyddiadau astudiaeth gychwynol o'r grŵp peilot, wedi'i gynnwys yn Atodiad 1, a oedd yn ddogfen gyfrinachol.

Ym mis Ionawr 2015, cynhaliwyd cyfarfod â pherchennog maes carafannau mawr i esbonio natur prosiect y Cyngor, ac roedd Atodiad 2 yn rhoi crynodeb o'r cyfarfod. Roedd swyddogion o Sir Ddinbych a Chonwy hefyd wedi cyfarfod i drafod natur y prosiect, graddfa'r broblem a'r potensial ar gyfer gweithio ar y cyd ar brotocol "Monitro Meysydd".

Atebodd Pennaeth Cynllunio a Gwarchod y Cyhoedd a Rheolwr Datblygu, Cynllunio a Gwarchod y Cyhoedd, gwestiynau'r Aelodau ac fe wnaethant roi'r cyngor a ganlyn:-

- ni chafodd carafannau unigol a leolwyd yng ngerddi anheddau preifat eu cynnwys yn y prosiect presennol, gan fod mwyafrif y rheini a oedd yn Sir Ddinbych yn rhan atodol o'r prif anedd;
- mae'r cyfreithiau cynllunio a thrwyddedu sy'n effeithio ar garfannau hefyd yn gymwys i gabanau gwyliau (*chalets*);
- os bydd perchnogion meysydd carafannau gwyliau yn caniatáu i berchnogion carafannau fyw ar eu meysydd am holl gyfnod eu trwydded e.e. 10 mis ac ati, ac os nad yw'n bosibl i'r perchnogion carafannau hynny roi cyfeiriad 'cartref' mewn man arall, gallai perchennog y maes a pherchennog y garafán ill dau fod yn atebol am gael eu herlyn ar y sail nad oedd y maes carafannau yn cydymffurfio â'i amodau cynllunio a thrwyddedu fel maes 'gwyliau', a pherchennog y garafán am ddefnyddio carafán gwyliau fel cartref parhaol;
- y flaenoriaeth o ran y gwaith ar gyfer y dyfodol fyddai rhwystro pobl rhag defnyddio eu carafannau fel cartrefi parhaol. Fodd bynnag, byddai angen rheoli hyn yn effeithiol i leihau effaith camau gorfodaeth ar unigolion, yr oedd rhai ohonynt yn agored i niwed. Hefyd, byddai angen cynlluniau wrth gefn i ymdrin â chanlyniadau unrhyw gamau gweithredu ar ran y Cyngor h.y. pobl yn dod yn ddigartref. Hefyd, gallai problem godi o ran ansawdd y carafannau mewn cymhariaeth ag ansawdd y tai sydd ar gael ar gyfer y bobl fyddai'n gorfod gadael eu carafannau a'u hamgylchiadau 'ariannol' i ddod o hyd i lety amgen;
- unwaith y byddai hyd a lled y broblem ac effaith ragweladwy'r camau gorfodaeth llym yn glir, byddai angen penderfynu beth ddylai'r Cyngor ei wneud mewn perthynas â thor-amod hanesyddol a'r hyn y byddai'n ei wneud yn y dyfodol i ymdrin â thorri amodau. Gallai cost polisi gorfodaeth hollgynhwysol fod yn uchel iawn a'r canlyniadau o bosibl yn amhosibl i'w rheoli ac yn niweidiol i enw da'r Awdurdod;
- roedd 2 faes carafannau preswyl yn Sir Ddinbych, un yn y Rhyl a'r llall ym Mhrestatyn;
- roedd perchnogion meysydd carafannau yn amodol i gyfraddau busnes yr Ardreth Annomestig Cenedlaethol (NNDR). Caiff hwn ei gyfrifo gan y Swyddfa Brisio a'i gasglu'n ganolog gan y llywodraeth, gan roi canran yn ôl i'r Sir drwy'r setliad Grant Cymorth Refeniw. Nid oedd dyletswydd ar yr Awdurdod lleol felly i ddarparu gwasanaethau fel casglu gwastraff ar y meysydd hyn;

- os amheuir bod amodau cynllunio neu drwyddedu yn cael eu torri, ni ellir defnyddio cyfreithiau Diogel Data yn gyfreithiol i atal gwybodaeth;
- newidiwyd y rheoliadau yn ymwneud â thocynnau teithio ar fysiau am ddim yn gynharach eleni. Ni fyddai unigolion a oedd yn nodi maes carafannau fel cartref parhaol yn gymwys i dderbyn tocyn ar fws am ddim;
- nid oedd cydymffurfiaeth â rheoliadau meysydd carafannau yn broblem a oedd yn unigryw i Sir Ddinbych, ymddengys fod y rhan fwyaf o awdurdodau lleol yn cael trafferth i blismona a gorfodi'r amodau a ganiatâwyd. Roedd yn deg dweud hefyd fod rhai perchnogion yn hunan-reoleiddio ac yn cydymffurfio â'r amodau a roddwyd arnynt.

Roedd yr Aelodau o'r farn fod angen ymchwilio i raddfa'r broblem, y costau posibl ac effaith yr opsiynau gorfodaeth, gan gynnwys o bosibl rhoi ystyriaeth i ddynodi rhai meysydd yn feysydd defnydd deuol – meysydd gwyliau a defnydd preswyl, ond gyda rhaniad clir rhwng y ddwy ardal ar y meysydd. Roeddynt hefyd o'r farn y dylid rhoi mwy o gyhoeddusrwydd i'r gwaith o reoleiddio'r meysydd carafannau yn well. O ganlyniad, fe wnaeth y Pwyllgor:-

BENDERFYNU – yn amodol ar y sylwadau uchod:-

- (a) *bod y Pwyllgor yn cefnogi cyfeiriad y prosiect hyd yma ac yn cydnabod maint posibl y gwaith a oedd yn mynd rhagddo; ac*
- (b) *y dylid cyflwyno canlyniadau'r gwaith cwmpasu ac opsiynau'r strategaeth ddrafft i reoleiddio meysydd carafannau yn fwy effeithiol gerbron y pwyllgor yn ystod haf 2015.*

7 RHAGLEN WAITH ARCHWILIO

Roedd copi o'r adroddiad gan y Pwyllgor Archwilio, a oedd yn gofyn i'r Pwyllgor adolygu a chytuno ar ei blaenraglen waith ac yn rhoi'r wybodaeth ddiweddaraf ar faterion perthnasol, wedi cael ei ddsbarthu ynghyd â'r papurau ar gyfer y cyfarfod.

Roedd copi o 'ffurflen cynigion yr Aelodau' wedi'i gynnwys yn Atodiad 2. Roedd copi o flaenraglen waith y Cabinet wedi'i gynnwys yn Atodiad 3. Roedd tabl yn crynhoi'r cynnydd ar benderfyniadau diweddar y Pwyllgor ac yn cynghori'r Aelodau ar y cynnydd a wnaed o safbwynt eu gweithredu wedi'i gynnwys yn Atodiad 4.

Gan mai cyfarfod nesaf y Pwyllgor fyddai'r cyfarfod cyntaf yn dilyn Cyfarfod Blynyddol y Cyngor, esboniodd y Cydlynnydd Archwilio y byddai angen i'r Pwyllgor benodi Is-gadeirydd ar gyfer y flwyddyn i ddod. Roedd disgrifiad o swyddogaethau Cadeirydd ac Is-gadeirydd y Pwyllgor Archwilio wedi'u cynnwys yn Nodiadau Briffio'r cyfarfod. Esboniodd y Cydlynnydd Archwilio y byddai'n gofyn am CVau gan Aelodau a oedd yn dymuno cyflwyno enwebiadau ar gyfer y swyddi, ac y byddai eu hangen erbyn 20^{fed} Mai, 2015.

Cytunodd yr Aelodau y dylid cynnwys adroddiad ar ganfyddiadau'r Grŵp Gorchwyl a Gorffen Tai Fforddiadwy ar flaenraglen waith y Pwyllgor yn y cyfarfod nesaf, yn dilyn ystyriaeth gan Friffio'r Cyngor.

Cyfarfu Grŵp Cadeiryddion ac Is-gadeiryddion Archwilio ar 2^{il} Ebrill, 2015. Yn ystod y cyfarfod rhoddwyd ystyriaeth i gais a wnaed yng nghyfarfod y Cyngor Sir ar 24^{ain} Chwefror, 2015 sef y dylid ystyried yn fanwl effaith yr oedi wrth hysbysu a dyrannu grant ariannu'r llywodraeth ganolog ar waith cynllunio a rheoli ariannol llywodraeth leol. Roedd yr Aelodau yn cytuno â'r farn a fynegwyd gan Grŵp Cadeiryddion ac Is-gadeiryddion Archwilio sef y dylai'r Pwyllgor gynnwys yr eitem hon yn ei blaenraglen waith yn y cyfarfod ym mis Gorffennaf, 2015. Hefyd, cytunwyd y dylid gwahodd Gweinidog Llywodraeth Cymru i ddod i'r cyfarfod i drafod sut y gellid gwella amseru hysbysiad a dyraniad y grant er lles pob parti.

Cytunodd yr Aelodau y dylid cynnwys adroddiad ar y Gwasanaeth Ieuencid, a'r cynnydd a wnaed mewn perthynas â'r ymarferiad mapio cymunedol ar y gwasanaethau sydd ar gael i blant a phobl ifanc, ym mlaenraglen waith y Pwyllgor yn y cyfarfod ym mis Medi, 2015 fel y nodir yn Atodiad 1.

PENDERFYNWYD – yn amodol ar y newidiadau a'r cytundebau uchod, y dylid cymeradwyo'r Rhaglen Waith a nodwyd yn Atodiad 1 i'r adroddiad.

8 ADBORTH GAN GYNRYCHIOLWYR Y PWYLLGOR

Roedd y Cadeirydd yn bresennol yng nghyfarfod Her y Gwasanaeth Addysg ar 22^{ain} Ebrill, 2015. Esboniodd fod y cyfarfod wedi bod yn gadarnhaol iawn a soniodd am y prif bynciau trafod a oedd yn cynnwys:-

- Y rhesymau pam y mae canlyniadau'r dangosyddion pynciau craidd yn Sir Ddinbych yn gamarweiniol.
- Swyddogaeth a chyfrifoldebau Llywodraethwyr AALI.
- Ymgynghori ar ansawdd a phenodiad Penaethiaid
- Y Gymraeg yn ysgolion Sir Ddinbych.
- Rheoli'r system arfarnu.

PENDERFYNWYD – y dylai'r Pwyllgor dderbyn a nodi'r adroddiad.

Daeth y cyfarfod i ben am 11.55 a.m.